

乾隆杭州府志

杭州府志卷七十六

名宦三

元

蒙古岱達克達里氏以至元十一年從巴延南征招降湖州守將二人行省第其功承制授行兩浙大都督府事二十一年拜江浙行省平章政事托賚斯鄂實傳旨中書省令悉代江浙省臣中書復奏帝曰朕安得此言傳者妄也如蒙古岱之通曉政事亦可代耶俄以言者召赴闕封其家貲遣使按驗無狀拜銀青榮祿大夫行省左丞相還鎮江浙時浙西大饑乃弛河泊禁發倉庫官貨抵其直買粟

以賑之言省治在杭州其兩淮江東財賦軍實既南輸至
杭復自杭北輸京城往返勞頓不便請移省治于揚州帝
從其言命爲江西丞相兼樞密院事

舊志

哈喇托克托仁宗時拜江浙行省左丞相下車進父老問
民利病咸謂杭城故有便河通于江滸堙廢已久若疏鑿
以通舟楫物價必平僚佐或難之托克托曰吾陞辭日密
旨許以便直行事民以爲便行之可也俄有旨禁勿興土
功托克托曰敬天先勤民民蒙其利則災沴自弇土功何
尤不一月而成

元史本傳

拜里索布哈字大用本雅庫特人至順中爲江浙行省叅

知政事江浙歲漕米由海道達京師拜里索布哈董其事
至正二年拜江浙行省左丞相行至淮東聞杭城大火疾
馳赴鎮卽下令錄被災者二萬三千餘戶戶給鈔一錠人
給月米二斗幼穉給其半又請日減酒課爲錢千二百五
十緡織坊減原額之半軍器漆器權停一年泛稅皆停事
聞朝廷從之又大作省治民居附其旁者增直買其基募
民就役則厚其傭直又請歲減江浙福建鹽課十三萬引
或遇淫雨亢旱出禱神祠無不應在鎮二年雖兒童女婦
莫不感其恩

元史
本傳

托歡達爾罕哈喇哈遜子也由太子賓客拜御史中丞襲

號達喇罕進御史大夫尋拜平章行省江浙進左丞相兼
領行宣政院重厚有父風喜讀書爲政不尚苛暴得衆心

舊志

多爾濟托克托子至正四年遷江浙行省左丞相時杭城
薦經災燬拜里索布哈森爲相庶務寬扞多爾濟咸仍其
舊汀州寇竊發調遣將士招捕之威信所及數月卽平杭
之耆老請建生祠如前丞相故事多爾濟辭曰昔者我父
平章官浙省我實生于此宜爾父老有愛于我我于爾杭
人得無情乎然今天下承平我叨居相位惟知謹守法度
不辱先人足矣何用虛名爲

元史本傳

史弼字君佐一名達賴根蠡州博野人至元十年從巴延南征進定遠大將軍十九年任浙西宣慰使二十一年春霖雨米價湧貴弼卽發米十萬石平價糶之而後聞于省省不能奪益出十萬石民得不饑

元史本傳

高興字功起蔡州人至元十二年巴延伐宋承制授興干戶由間道奪獨松關進至武康巴延北還留興以兵取郡縣之未下者事平遷浙東道宣慰使改浙西道宣慰使拜江淮行中書省叅知政事大德三年改江浙行省平章政

事

元史本傳

托克托穆呼哩四世孫成宗時拜上都留守三年拜江浙

行中書省平章政事始至飭左右毋預公家事且戒其掾屬曰僕從有私囑者慎勿聽若軍民諸事有關於利害者則言之當言不言爾之責也言而不聽我之咎也聞者悚慄時朱清張瑄以海運致位叅知政事多行不法以黃金五十兩珠三囊賂托克托求蔽其罪托克托繫之遣使者以聞帝曰托克托我家老臣子孫其志固宜與衆人殊賜內府黃金五十兩寵賚之有豪民白晝殺人脫脫立命有司據法誅之豪猾屏息民賴以安

浙江通志

察爾杭錫雅爾人大德元年拜江浙行省平章政事江浙稅糧甲天下平江嘉興湖州三郡當江浙什六七而其地

極下水鍾爲震澤震澤之注由吳淞江入海歲久江淤塞
豪民利之封土爲田由是浸淫泛溢敗諸郡禾稼朝廷命
行省疏導之發卒數萬人察里董其役凡閱四月畢工召
入爲中書平章政事

舊志

布延特穆爾字珍卿唐輝和爾氏天歷間拜江浙行省平
章政事持身廉介人不敢干以私性至孝嘗乘花馬時爲

花馬兒平章云

元史本傳

咱爾特穆爾阿嚕溫氏至順元年遷江浙行省平章政事
以厚嚴爲政部內肅然尋召拜御史中丞

元史本傳

庫庫字子山哈喇氏幼隸國學其正心修身之要得諸許

衡順帝至正時拜江浙行省平章政事雅愛儒士甚于飢

渴士大夫翕然宗之

元史本傳

慶通字明德昂里氏至正十年遷平章行省江浙脫脫統大兵南征一切軍資衣甲器仗穀粟薪藁之屬咸取具于

江浙慶通規措有方陸運川輸者千里相屬出鎮海寧州

州距杭百里地瀕海磽瘠民甚貧居二年盜息而民阜在

江浙七年涉歷險艱勞績最著

元史本傳

伊魯特穆爾至正十二年拜平章政事行省江浙至鎮引僚屬集父老詢守備之方招募民兵數千人號令明肅

元史

本傳

董士選字舜卿文炳次子爲統軍總管從文炳入宋宮收
其文書圖籍秋毫無所取以中書左丞與平章政事察里
往鎮浙西聽倅舉僚屬至部察病民事悉以帝意除之民
大悅浙多湖泊廣蓄泄以備水旱率爲豪民占以種藝水
無所居積故數有水旱士選與察爾力開復之成宗卽位
累遷江浙行省右丞

浙江通志

鄂勒哲都至元十一年詔拜爲江浙行省左丞兼管軍萬
戶初浙西私鹽吏莫能禁鄂特哲圖詣松江上海收鹽徒
五千隸軍籍授中書左丞行浙西道宣慰使成宗卽位授

江浙行省平章政事

元史本傳

吳元珪字君璋廣平人大德六年拜江浙行省參知政事
初朱清張瑄以財雄江南徧以金幣連結當路而江浙省
臣爲尤甚唯元珪一無所汙皇慶元年拜江浙行省左丞
江淮漕臣言江南殷富蓋由多匿腴田若再行檢覆之法
當益田畝累萬計元珪曰江南之平幾四十年戶有定籍
田有定畝一有動搖其害不細執其論固爭月餘不能止

移疾去

元史本傳

張思明字士瞻其先獲嘉人後徙居輝州大德十年除江
浙行中書省左右司郎中浙大饑首贊發廩賑之遷兩浙
鹽運使歲課充贏僚屬請上增數思明日羸縮不常萬一

以增爲額是我希一己之榮遺百世之害天歷元年爲江浙行中書省左丞會陝西大飢中書撥江浙鹽運司歲課十萬錠賑之吏白周歲所入已輸京師當回咨中書思明曰陝西飢民猶劍在涸轍往復踰月是索之枯魚之肆也其以下年未輸者如數與之有罪吾當坐朝廷懸之以中書左丞相召思明平生不治產不蓄財收書三萬七千餘

卷尤明于律

元史本傳

王克敬字叔能大寧人累陞江浙行省左右司都事拜監察御史尋遷左司都事時英宗勵精圖治更前政不便者克敬言兩浙煎鹽戶牢盆之役其重者尤害民當免其他

役從之行省檄克敬抽分舶貨拗蕃者例籍其貨商人以
風水爲解有司不聽克敬曰某貨出某國地有遠近貨有
輕重冒險出萬死舍近而趨遠棄重而取輕豈人情耶具
以上聞商人德之轉兩浙鹽運司使元統初爲江浙行省
叅知政事大旱諸民田減租惟長寧寺田不減遂移牘中
書以謂不可忽天變而毒疲民嶺海猖賊竊發朝廷調戍
兵之在行省者往討之故事漢人不得與軍政克敬抗言
行省任方面之寄豈可拘法坐視乃調兵往捕之視事五

月請老

元史本傳

蘇天爵字伯修真定人至正七年拜江浙行省叅知政事

江浙財賦居天下十七事務最煩劇天爵分條目別細鉅
不遺復爲兩浙都轉運使時鹽法弊甚天爵拯治有方所
辦課爲鈔八十萬錠及期而足十二年淮寇延及江東詔
仍江浙行省叅知政事總兵于饒信所克復者一路六縣
其方畧之密節制之嚴雖老帥宿將不能過之卒于軍

元史

本傳

樊執敬字時中鄆城人至正十年授江浙行省叅知政事
賊犯餘杭執敬調兵出戰掾史蘇友龍言于執敬曰賊且
至城內空虛無備奈何執敬曰吾淬礪戈矛當殲此以報
國倘或不克有死而已何畏哉俄報賊已至執敬遽上馬

帥衆而出中塗與賊遇乃射死賊四人賊又逐之射死三人已而賊來方盛填咽街巷且縱火衆皆潰去賊知其無援呼執敬降執敬怒叱之曰逆賊守關吏不謹汝得至此恨不碎汝萬段何降耶乃奮力斫賊因中槍而墮從僕田也先馳救之亦中槍死贈翰林學士承旨追封魯國公

元史

本傳

貢師泰字泰甫宣城人至正十四年除吏部侍郎奉命和糴于浙右得糧百萬石以給京師爲平江路總管明年授兩浙都轉運鹽使剔其積蠹通其利源大課以集國用資之復除江浙行省叅知政事

元史本傳

董搏霄字孟起磁州人由國子監生歷浙東宣慰副使理
冤獄革弊政至正十一年從江浙平章教化征安豐賊渡
江至湖州德清縣而徽饒賊已陷杭州搏霄曰賊縱欲不
備宜急攻之遂進兵杭城賊迎敵至鹽橋搏霄麾壯士突
前斬級而諸軍夾擊之凡七戰追賊至清河坊賊奔接待
寺塞其門而焚之賊皆死遂復杭州已而餘杭武康德清
次第以平賊復自昱嶺關寇於潛行省假搏霄爲叅知政
事提兵討之卽進兵至叫口及虎檻遇賊大破之追殺至
於潛復其縣又復昌化縣及昱嶺關賊又犯千秋關兵大
至搏霄按軍不動遣人執白旗登山望賊約曰賊以我爲

怯必少懈伺其有間則麾所執旗又伏兵城外皆授以火礮復約曰見旗動礮即發已而旗動礮發兵乃盡出斬首數千級遂復千秋關賊復攻獨松百丈幽嶺三關搏霄又分爲三軍一出獨松一出百丈一出幽嶺然後會兵搗賊巢遂乘勢復安吉十七年陞淮南行樞密院副使後與毛貴戰死贈河南行省平章政事追封魏國公謚忠定

元史本傳

台哈布哈字兼善年十七舉鄉試第一明年對策大廷賜進士及第授集賢修撰轉秘書監著作郎拜江南行臺監察御史時御史大夫托懽怙勢台哈布哈劾罷之數轉爲江浙行省左右司郎中浙西大水害稼會台哈布哈力言

于中書免其租

舊志

薩實國王蘇袞察之子也至元十一年世祖命總兵從伐宋渡江東下會丞相巴延分三道並進薩實部署將校申明約束吏民安堵如故十四年拜江南諸道行臺御史大夫浙東盜起浙西宣慰使齊爾巴縱兵肆掠俘及平民乃遣御史商琥據錢塘津渡閱治之得釋者以數千計齊爾

巴還都奏執治其罪二十年拜江淮行省左丞相

舊志

桑節字吉甫河西人至正八年爲江南行臺御史大夫獨持風裁御史行部必勅厲而遣之湖東僉事三寶珠儒者也性廉介所至搏貪猾無所貸御史有以私請者拒不納

則誣以事劾之章至桑節怒曰若人之廉孰不知之乃敢
爲是言耶卽奏罪御史而白其誣執政者惡之移湖廣行
省平章政事改江西行省平章政事討賊死之

元史本傳

張珪字公端宏範子大德三年遷浙西肅政廉訪使劾罷
郡長吏以下三十餘人府史胥徒數百徵贓巨萬計珪得
監司奸利事將發之事干行省有內不自安者欲以危法
中珪賂遺近臣妄言珪有厭勝事且沮鹽法帝遣官雜治
之得行省大小吏及鹽官欺罔狀皆伏罪召拜樞密院事

元史本傳

塔爾瑪高昌人泰定元年爲浙西廉訪使會文宗發江陵

阿里哈圖來諭旨求賂不獲還譖于朝召至京處以重罪
比至帝怒解遷上都同知留守卒官陝西行臺中丞

舊志

策丹蒙古人順帝初爲浙西肅政廉訪使有以駙馬爲江
浙行省丞相者其宦豎恃公主勢坐杭州達魯噶齊位令
有司強買民間物不從輒毆之有司來白策丹卽逮之械
以令衆自是丞相府無敢爲民害者尋召爲同僉樞密院
事在位剛介終始一節有古遺直風

元史本傳

高睿河西人除嘉興路總管歷遷浙西道肅政廉訪使鹽
官州民有連結黨與持郡邑短長目曰十老吏莫敢問睿

悉按以法闔境快之

浙江通志

韓鏞字伯高濟南人延祐進士天歷元年除僉浙西廉訪司事擊姦暴黜貪墨所至郡縣爲之肅然轉江浙財賦副

總管拜中書叅知政事

元史本傳

呂思誠字仲實平定州人泰定進士僉廣西廉訪使事移浙西達實特穆爾時爲南臺御史大夫與江浙省臣有隙嫉思誠劾之思誠曰吾爲天子耳目不爲臺臣鷹犬也不聽已而聞行省平章左吉貪墨浙民多怨之思誠奏疏其罪流之海南官至中書左丞

元史本傳

善斯字得之其先大食國人至元三年除僉浙西肅政廉訪司事卽按問都轉運鹽使海道都萬戶行宣政院等官

賊罪浙右郡縣無敢爲會墨者復以浙右諸僧寺私蔽衛
民有所謂道人道民行童者類皆瀆倫常隱徭役使民力
日耗乃建議請勒歸本族俾供王賦庶以少寬民力朝廷
是之卽著爲令善斯歷官臺憲所至以理冤澤物爲已任
平反大辟之獄先後甚衆然未嘗故出人罪以市恩召爲
秘書少監不赴追封恒山郡侯謚文孝

元史本傳

論臧玉爾拜哩巴雅特台氏至元中爲江南浙西道提刑
按察使浙西民衆事繁按察唯務鎮靜人服其知大體

元史

本傳

仙律論臧子也襲父官拜武德將軍江南浙西道提刑按

使時浙江行省御史臺建于杭仙律上言行省專控江浙
在杭爲宜行臺總鎮江南宜常巡歷不宜偏在杭且兩大
府並立勢逼則事窒情狎則威褻盍命御史隨在爲行臺
從之舊志

陸垕字仁重江陰人累遷至浙西廉訪使所至以黜賊吏
洗冤獄爲已任嘗上章奏免儒役及舉行浙西助役法卒

謚莊簡

浙江通志

張礎字可用其先渤海人徙通州至元十四年爲江南浙
西道提刑按察副使佩金符宣慰使實哩貪暴掠良民爲
奴礎劾黜之遂安縣民負險爲亂命礎與同知浙西道宣

懋使劉宣領兵捕之宣卽欲進兵礎曰江南新附守吏或失撫字宜遣人招諭以全衆命遂遣人諭之逆黨果自縛請罪礎釋之

元史本傳

高源字仲淵晉州人僉江南浙西道提刑按察司事劾達魯噶齊馬忽奪民田及他不法事恕懼走賂權臣阿哈瑪以他事誣源旣繫獄忽釋之先是源所居鄰里多阿合馬姻戚素知源事母至孝至是聞源坐非辜悉詣阿哈瑪曰源孝子也非但我知之天必知之况媒孽之罪非實若妄殺源悖天不祥阿哈瑪感悟得不死

元史本傳

徐琰字子方東平人至元三十一年拜浙西肅政廉訪使

嘗作戒石銘曰天有明鑑國有公法爾畏爾謹以中刑罰
卽宋太學舊址改建西湖書院琰有文學重望東南人士

重之

浙江通志

田滋字榮甫開封人大德二年遷浙西廉訪使有縣尹張
或者被誣以賊獄成滋審之但俯首泣而不語滋以爲疑
明日齊沐詣城隍司禱曰張或坐事有寃狀願神相滋明
其誣守廟道士進曰曩有王成等五人同持誓狀到祠焚
禱火未盡而去爐中得其遺稿今藏于壁間豈其人耶視
之果然明日詣憲司詰成等不服出所得火中誓狀示之

皆驚愕伏辜或得釋

元史本傳

趙宏偉字子英甘陵人後徙潁州大德五年僉浙西道肅

政廉訪使事

元史本傳

浙西旱蠲民租九萬餘石吏復徵于民

宏偉核實卒蠲之全活甚衆

浙江通志

王都中字元俞福寧州人武宗除兩浙都轉運鹽使請于行省徧歷三十四場驗其物力高下以損益之役既平而課亦足公私便之天歷初整點七路軍馬境內晏然轉江

浙行省叅知政事謚清獻

元史本傳

瞿霆發字聲父上海人以功授兩浙都轉運副使海潮壞鹽場死者萬計霆發傾力救之流亡復還鹽事以集仁宗

時拜運使更以最聞

浙江通志

李廷佐字唐卿陝西人至正七年爲兩浙都轉運使嚴明有才幹悉心鹽筴之事凡亭民所不便者罷之欲者行之吏胥贖貨有蠹鹽法者悉屏斥之性無嗜好暇則與幕下講誦經史以爲樂聲譽赫然陞戶部尚書

浙江通志

陳思濟字濟民柘城人以才器見稱同知兩浙都運司事胥吏侵漁民困于賦役悉蠲除之加少中大夫同知浙東道宣慰司事時浙西大水民饑浙東倉廩殷實卽轉輸以賑之全活者衆檄上中書奏允之

元史本傳

趙知章字伯常睢陽人兩浙轉運司同知以陸運困民請因歲饑浚河民得錢以爲食官得河以浮運稽姦貪兼戶

之弊察私熾濫及之寃儒學提舉陳旅爲撰德政碑

浙江通志

托歡察爾字彥明塞善齊氏至正二年由戶部郎中出爲兩浙鹽運同知嘗言鹽者于國爲大利于民爲大病急之則政弛乃先具條教嚴立期約而加以寬恤民感奮盡力奉令無敢後每諭之曰吾權鹽充數足矣若求羨餘以希秩賞吾弗忍也越半年不事鞭笞而鹽皆足持已廉潔但

坐廳事退卽闔門獨處不可干以私

浙江通志

李守中字正卿延祐六年除兩浙轉運鹽司副使守中言法久則弊理宜變通今兩浙竈民凋弊日甚當驗其恒產差爲上下竈民旣爲國輸課不當復役里正代償民租在

官五年熟知其弊工本親給與民官屬不敢稍有所措克
故事集而課亦溢比終更增鹽五萬餘引以嘉議大夫工

部尚書歸

浙江通志

戴文璧字君章沂州琅琊人少負經濟以廉隅自砥除爲
兩浙轉運判官嘗分職巡鹽官場法飭弊釐國課足而羣

戶安堵

浙江通志

曹鑑字克明宛平人至治二年授江浙行省左右司員外
郎明年奉旨括釋氏白雲宗田稽檢有方不數月事集纖
毫無擾天歷元年調江浙財賦府副總管屬淮浙大水民
以苗告鑑損其賦什六七勢家因而詭免者鑑覈實諭令

首輸陞禮部尚書

元史本傳

余謙字峻山其先咸陽人後居池州謙爲文法典謨訓誥書宗隸古除江浙儒學提舉爲人廉方有才幹每以風紀

自任其提舉學事程試頗嚴云

舊志

趙孟頫字子昂宋太祖子秦王德芳之後也至大初除集賢直學士浙江等處儒學提舉孟頫博學多聞摻履純正書畫絕倫通佛老之旨史官楊載稱孟頫之才頗爲書畫

所掩人以爲知言

舊志

宇文公諒字子貞吳興人登至順四年進士除江浙儒學提舉平居雖暗室必正衣冠端坐嘗撰手記一冊識其首

曰書有所爲暮則書之其不可書卽不敢爲天地鬼神實聞斯言其檢飭之嚴如此

舊志

黃潛字晉卿婺州義烏人延祐二年進士至正初出爲江浙儒學提舉潛博極天下之書而約之于至精剖析經史疑難及古今因革制度之屬旁引曲証多先儒所未發文詞嚴密精切其介特之操如水壺玉尺纖毫弗污稱文行

宗儒云

舊志

陳旅字衆仲興化莆田人翰林侍講學士虞集雅愛重之元統初出爲江浙儒學副提舉旅于文自先秦以至唐宋無所不究故其文典雅峻潔必求合于古作者平生尤篤

師友之義每感虞集爲知己其在浙時集已歸田歲大比
旅請于行省親奉警幣請集主文鄉闈欲爲問候計乃衝
冒炎暑千里訪集于臨川集感其來留旬日而別惓惓以
斯文相勉集每語學者必以旅爲益友云

舊志

海籌宜根雅里子也由宿衛世祖朝累官至大中大夫杭
州路達魯噶齊招復流民有恩惠

元史特
格本傳

梁曾字貢父燕人大德元年除杭州路總管戶口復者五
萬二千四百戶請禁暮夜鞠囚游街酷刑朝廷是之著爲

令

元史
本傳

趙璉字伯器至治進士除杭州路總管強毅開敏精力絕

人浙右病于徭役民充坊里正者皆破其家朝廷令行省
召八郡守集議便民之法璉獻議以屬縣坊正爲僱役里
正用田賦以均之民咸以爲便有盜誘其同惡持刃出市
斫人以索金市民乃戶斂以予之人無敢言者璉曰此不
可長也遣卒掩捕之盡戮諸市踰年召拜吏部侍郎杭人
思之刻其政績于碑

元史本傳

高納麟河西人太傅寧國公睿之子用名臣子入備宿衛
起家中書舍人天歷元年除杭州路總管鋤奸去蠹吏畏

民服

浙江通志

寶格輝和爾人至元中除杭州路總管有善政杭學卑陋

嘗大作禮殿講舍一新之十二年斬黃寇逼境陞江浙行

省叅政引兵禦寇弗勝乃投西湖而死

浙江通志

特穆賚斯字周賢康里人至正十三年守杭屬斬黃寇犯

郡廟學鞠爲瓦礫特穆賚斯以學校教化所繫乃謀興造

基址舊窄隘因購禮拜寺地以充廣之

浙江通志

夏思忠字仲信高郵人授江浙行省郎中改杭州路總管

思忠開敏無滯碍遇事勇于有爲杭學兵燹之後前守特

穆賚斯興造甫完守廟者不戒于火悉焚之思忠慨然以

興復爲己任基址廣袤廟宇嚴整爲浙右之冠

浙江通志

孫彥卿句容人由人材累官杭州路總管廉慎有爲部中

鎮靜以疾卒于官

萬歷舊志

申屠致遠字大用東平壽張人宋平焦友直楊居寬宣慰
兩浙舉爲都事轉臨安府安撫司經歷爲杭州路總管府
推官宋駙馬楊鎮從子玠節富于貲守藏吏姚溶竊其銀
懼事覺誣玠節陰與宋廣益二王通獄具致遠讞之得其
情杭人金淵者欲冒籍爲儒儒學教授彭宏不從淵誣宏
作詩有異志揭書于市遷者以上致遠察其情執淵窮詰
罪之屬縣械反者十七人訊之蓋因寇作以兵自衛實非
反者皆得釋嘉木楊喇勒智作浮圖于宋故宮欲取高宗
所書九經石刻以築基致遠力拒之乃止大德二年僉淮

西江北通肅政廉訪司事卒致遠清修苦節恥事權貴聚

書萬卷名曰墨莊家無餘產

元史本傳

賈策字治安其先開封人至元中爲仁和尹有能名善歌

詩

舊志

臧夢解慶元人成宗時知鹽官州剛直廉正學有淵源其

所定差役法最稱公平自夢解來蒞增戶凡七百六十有

四增田凡四百四十三頃云

萬歷舊志

李懋至元四年知海寧州修瓦石堰重設車注之具民皆

利之

萬歷舊志

張光祖知海寧州以旱禱妙智閣下甘雨隨澍明年復大

早光祖復禱一兩三日又嘗治長安三閘秩滿日劉基作

序送之

海寧縣志

王輔字正卿冀寧人至正丙申知海寧州心存嫗育有所徵輸于民恒涕泣命之時納哈取宜與鄂特哲克大麻慶

通討華亭後皆鎮禦州境民苦供億輔曲加綏戢俾無逋

亡杭州路總管皎珠爲作王州守安民碑

海寧縣志

李質字子文大名人爲富陽縣尹有美政大德八年縣學

教諭董華撰去思碑

萬歷舊志

夏仲與爲富陽尹泰定乙丑春秩滿還朝民懷其惠政立碑識感元季碑仆草莽正統間知縣吳堂訪得之昇置廳

事然刻文殘缺不可爲句矣

萬歷舊志

曹忠字惟良燕人爲富陽尹下車首以敦本厚俗爲先務屬孔子廟壞乃捐圭田之入率士籍之優饒者以建立爲事廟旣成聘名師招俊民而教養之不數月絃歌禮讓之風達於郊鄙繼新社稷之祀下至郵驛河梁百廢具興歲六月不雨禾將槁忠走祈山川甘雨隨注馬山有虎白晝傷人忠投檄山靈虎尋去

揚維楨曹尹惠政碑

線榮字子華大德間爲餘杭縣尹時永安寺僧構結豪家倚勢壓鄉民榮在任每挫辱之一日江浙省平章伊蘇達爾因獵至其寺僧譖之遂使辱榮榮抗辭以對左右皆懼

由是名重一時

餘杭縣志

常濟大德十一年爲餘杭縣尹時歲饑民多流亡濟請于

江浙行省以本縣儲糧賑之活民萬數

成化舊志

王昌字子榮益都人延祐初爲餘杭尹時臨安民許椿赴

闕言各縣田稅不均命平章張閻經理昌力辨之事得白

惠及旁邑政績著聞轉徽州路推官及卒還葬餘杭觀國

山民立石頌功且塑像祀之

成化舊志

常野先爲餘杭縣尹增築南湖塘又增縣西官塘十八里

迄今免水溢之患民懷其惠

成化舊志

賈汝霖至正初臨安尹爲政廉平邑人稱之

萬歷舊志

巴圖魯鼎回回人皇慶間爲於潛達魯噶齊有善政民爲

立去思碑

萬歷舊志

齊禧字公望高郵人至正癸未以國子生爲於潛尹有美

績善文詞後拜監察御史

萬歷舊志

張傑字漢臣世家濟南爲於潛令至元乙未賊起安吉東抵縣境傑以義結民爲伍乘法修門墜理器械立旗色號凡若干伍傑申令今日與民共死生若輩偷生令以伍乘法殺若輩吾偷生若輩亦以伍乘法殺令卽夜統衆二千人跡賊所往殺其魁及從十人賊望風奔潰明年賊又自徽突抵昌化昌化去縣僅三十里居民皆荷擔謀徙傑備

牛酒呼民復以伍乘法矢如初賊素聞傑名皆遁去縣訖安堵如故仍調鄉夫守禦四門晝理縣事夜巡縣境以爲常夏四月淫雨三麥垂稔而腐傑疏諸岳祠痛自責者三

而天大霽

楊維禎張令禦寇碑

蔣文煥字彥章蒙城人至正庚子爲於潛尹時當兵凶疾疫之餘專以招徠撫字爲務

萬歷舊志

劉公弼字長輔至元中知新城百廢具舉築新堰通水利

久而賴之

舊志

阿魯鼎大德初爲昌化達魯噶齊至元間邑燬于紅巾寇魯鼎力任舉廢公署民廬多所興建災亂之餘百姓久賴

高歷
舊志

宜德寧古里延祐間爲昌化達魯花赤作士勸農政教兼
舉建義倉增學廩百廢以興稱爲才令

舊志

齊光祖字起宗大興人至正丙申以紹興路錄事爲昌化
縣尹時四境有兵光祖乃糾民兵爲團保計邑賴以安後
苗軍至邑築城獷悍可畏每有需索于民光祖力拒之人

稱其剛果

成化
舊志

章沅一名元佐字舜臣昌化縣人至正丁酉間爲昌化尹
授承直郎又以守禦有功丞相達實特穆爾承制授浙東
宣慰司經歷仍領昌化尹事沅蒞事日久招徠撫諭民皆

德之

萬歷舊志

夏泰亨字叔通少嘗受學于韓性兩領江浙鄉薦用至治

龍興恩例陞杭州路儒學教授姿性詳雅經術精深學者

推之

舊志

趙承宣字元臣臨安人天性鯁介至正末兵興上弭盜安

民十策于叅政董孟起辟爲昌化縣學諭肅規訓勤教督

後擢崇德州同知

昌化縣志

邱岳錢塘人爲於潛簿興建學校勉進後學人多稱之

舊志

沈兼善字達卿崇德人有文學至正中爲昌化簿涖事明

敏嘗從董搏霄收寇昱嶺返邑惟務撫安

萬歷舊志

杭州府志卷七十六終

杭州府志卷七十七

名宦四

明上

湯和字鼎臣濠人洪武初以御史大夫拜征南將軍討方

國珍諭降之浙東悉定

明史本傳

洪武十八年奉命巡行海徼

相度地形改創衛所巡司險要爲防禦計海寧縣城亦其

所增築也迄今談兩浙備倭方畧多推本于湯襄武云

舊志

鄧愈虹縣人太祖下浙西愈再遷僉行樞密院事畧陪安

李伯昇來援敗之閑林寨遣使說降後封衛國公贈寧河

王謐武順

明史本傳

胡德濟字世美大海養子擢浙江行省參知政事移守新城士誠將李伯昇帥步騎大入寇德濟固守李文忠馳救德濟出兵夾擊大破之時德濟所部有潛移家入新城者文忠疑德濟使然誅其都事羅彥敬欲徵戒德濟將士怒走告德濟德濟怡然曰右丞殺彥敬自爲廣信作戰衣有弊耳再言者斬于是太祖召德濟褒諭之而責文忠失將士心且曰胡德濟之量汝不及也擢浙江行省右丞改左

丞移鎮杭州

明史胡大海傳

按舊志載胡大海攷史傳大海功績多在浙東其子德濟守新城則有功于杭也故刪大海而錄德濟

李文忠字思本盱眙人太祖姊子也令從己姓年十九以舍人將親軍敗苗軍于於潛昌化士誠將李伯昇以二十萬衆攻新城文忠馳救去新城十里而軍德濟使人告賊勢盛宜少駐以俟大軍文忠曰在謀不在衆彼衆而驕我少而銳以銳遇驕必克之矣橫槊引鐵騎數十乘衝其中堅所向披靡伯昇僅以身免召歸宴勞遣還鎮明年大軍伐吳令攻杭州以牽制之文忠克桐廬富陽遂攻餘杭守將謝五降遂趨杭州守將潘元明亦降整軍入下令曰擅入民居者死一卒借民釜斫以徇城中帖然加行省平章政事復姓爲李後諭功封曹國公贈岐陽王諡武靖

明史本傳

潘原明直隸泰州人初與張士誠輩以鹽徒起爲浙江行省平章守杭城李文忠師至錢塘原明以全城歸欵兵不血刃民免鋒鏑有德于杭民甚鉅仍受浙江行省平章

舊志

朱亮祖六合人授指揮使李文忠破李伯昇于新城亮祖乘勝燔其營落數十獲同僉元師等六百餘人軍士三千馬八百匹鎧甲無筭會攻桐廬圍餘杭遷浙江行省叅政

副李文忠守杭州

明史本傳

蔡哲字思賢湖廣武昌人洪武二年浙江行省叅知政事才優經濟識達機宜遇事井井犁然中蔡用法平恕民皆

悅之

舊志

夏原吉字維詰湘陰人鄉薦入太學擢戶部主事建文初擢戶部右侍郎進尚書永樂元年浙西大水命原吉治之原告請循禹三江入海故蹟濬吳淞下流上接太湖而度地爲間以時蓄洩從之役十餘萬夫原吉布衣徒步日夜經畫盛暑不張蓋曰民勞吾何忍獨適浙西大饑命原吉往賑發粟三十萬石給牛種姚廣孝還自浙西稱原吉曰古之遺愛也

明史本傳

胡榘字元節江西豐城人永樂九年進士宣德初以大理卿奉命巡視兩浙諸郡奸宄屏迹海寧諸衛所各言軍餉不足榘令嘉興等府以所收贓米支給又奏兩浙累歲逋

稅輸納艱難詔許以絲絹等物代輸一時便之所至於困窮興學校風猷振厲奸民不便其所爲權貴挾私怨者又多造飛語衆口交謗上倚信槩不爲動也

舊志

彭韶字鳳儀莆田人天順元年進士孝宗卽位召爲刑部右侍郎嘉興百戶陳輔緣盜販爲亂陷府城大掠遁入太湖遣韶巡視韶至賊已滅乃命兼僉都御史整理鹽法韶以商人苦抑配爲定折價額蠲宿負憫竈戶煎辦徵賠折閱之困繪入圖以獻條利病六事悉允行宏治二年秋還

朝明史
本傳

胡宗憲字汝徵績溪人嘉靖進士歷知縣擢御史三十三

年按浙江歙人汪直據五島煽諸倭入寇而徐海陳東麻
葉等巢柘林乍浦川沙窪張經破倭于王江涇宗憲與有
力超擢巡撫倭犯浙東以宗憲爲兵部右侍郎任總督初
宗憲令客蔣洲陳可願諭日本國王遇汪直養子激于五
島邀使見直宗憲以直同鄉里欲招致之釋直母妻于金
華獄資給甚厚直大喜遣激等護可願歸宗憲厚遇激令
立功激遂破倭舟山表賜激等金帛縱之歸激大喜以徐
海入犯來告亡何海果引倭分掠慈溪自攻乍浦陳東麻
葉與俱宗憲壁塘棲與巡撫阮鶚相犄角會海趨皂林鶚
走桐鄉賊圍之宗憲遣指揮夏正持激書邀海降海曰兵

三路進不由我一人也。正曰：陳東已他有約，所慮獨公耳。海遂疑東而東知海營有宗憲使者，大驚。由是有隙。正乘間說下海，海遣使來謝解柵圍，東去復巢乍浦。初海入犯，焚其舟，示士卒無還心。宗憲使人語海曰：若已內附而吳淞江方有賊，何不擊之以立功？且掠其舸爲緩急計。海以爲然，逆擊之。朱涇宗憲潛焚其舟，海心怖。以弟洪來質。宗憲因厚遇洪，諭海縛東。葉許以世爵，海果縛葉以獻。宗憲解其縛，令葉以書至東。圍海而陰泄其書于海。海怒，海妾受宗憲賂，亦說海。于是海復以計縛東來獻。率所部降宗憲，慰諭之。海自擇沈莊屯，其衆沈莊者東西各一，以河

爲塹宗憲居海東莊以西莊處東黨令東致書其黨曰督
府檄海夕禽若屬矣東黨懼乘夜攻海海挾兩妾走間道
中稍官軍圍之海投水死遂俘洪東葉及海首獻京師加
宗憲右都御史命兼浙江巡撫事蔣洲在倭中諭主源義
長源義鎮入貢遣夷目善妙等隨汪直來市至岑港泊焉
直道激詣宗憲宗憲慰諭遣夏正偕往宗憲嘗預爲赦直
疏引激入臥內陰窺之激語直乃入謁宗憲令至杭下獄
論死以功加太子太保明年賊悉蕩平加少保

明史本傳

阮鶚字應薦桐城人嘉靖進士官浙江提學副使時倭薄
杭州鄉民避難入城者有司拒不許入鶚手劍開門納之

全活甚衆擢右僉都御史巡撫浙江

明史胡宗憲傳

士民德之相

與立祠

浙江通志

甘士价號紫亭信豐人萬歷進士巡撫兩浙甫下車首選材官訓標兵裁部差汰冗役禁宴會省靡費躬行儉約創武林書院于中衢講明正學歲大祲請留漕米數十萬石捐助若干兩議米議粥議遠近分賑又議薦紳素封自賑其鄉悉自擘畫遂以是得疾臥闔中時當遣汎猶力疾出屬事戒諭之卒時筐篋無存歛以弊衣士民號慟之聲連街達陌聞于朝立祠歲祭

浙江通志

劉一焜字元丙萬歷進士擢右僉都御史巡撫浙江織造

中官劉成卒一焜屢疏請勿遣代已得請會中官呂貴護成遺痲奸人遂請留貴督織造疏直達禁中一焜與巡按李邦華極論其罪帝卒命貴代之一焜復疏爭不報貴既任條行十事多所侵擾一焜疏駁且禁治其爪牙貴為歛威一焜以暇築龕山海塘千二百丈濬復餘杭南湖民賴

其利

明史本傳

王謙蒲州人萬歷進士官工部主事權稅杭州羅木營兵變脅執巡撫吳善言謙馳諭之乃解終太僕少卿

明史本傳

張佳允字肖甫銅梁人嘉靖進士萬歷十年浙江巡撫吳善言奉減月餉東西二營兵馬文英劉廷用等搆黨大噪

縛毆善言上以佳允代善言甫入境而杭民以行保甲故亦亂佳允問告者曰亂兵與亂民合乎曰未也佳允喜曰速驅之既至民剽益甚佳允從數卒伴問民所苦衆益張夜掠巨室火光燭天佳允召遊擊徐景星諭二營兵令討亂民自贖禽百五十人斬其三之一乃伴召文英廷用予冠帶而密屬景星斬七人并文英廷用斬之二亂悉定優詔褒美尋加右都御史拜戎政尚書諡襄憲

明史本傳

汪霖字潤夫六安州人景泰進士天順間以監察御史按浙時錦衣指揮門達怙寵擅權好作威福舉朝側目屬共子商于浙鎮守以下咸相禮敬霖獨不爲禮歸譖于達達

怒遣人偵之卒無可罪累官僉都御史

舊志

李綱字廷張長清人天順進士授御史按浙江劾去賊吏至四百餘人時目爲鐵御史遷右僉都御史督漕兩淮卒

上聞其清節特賜祭葬

明史李侃傳

侶鍾字大器鄞城人成化進士授監察御史按浙江力持憲綱嘗曰小民之不得安于田里者有司虐政害之也彼賣菜傭何能爲哉一時墨吏皆望風引疾去仕至戶部尚

書

浙江通志

劉魁字士元高唐州人成化進士十九年按浙憲體明肅紀法森嚴按治奸回不撓貴勢竟以直道忤物左遷黃梅

丞屢薦不起聲望益著

舊志

荆茂字庭春湖廣寧遠人成化戊戌進士二十二年按浙先是糧無定額胥里爲奸茂至與郡邑能吏熟議總計所治地里定爲糧則正耗折減一以國儲爲準圖籍既定吏弊頓祛藩司有僞牒竄名胥吏者茂盡發之至八百餘人桎梏相屬傳聞京師人以爲奇績伸冤擊奸嚴科舉以得士人心傲惕風采赫然

舊志

暢亨字文通河津人成化進士御史按浙奏罷上供綾紗

等物

明史
洪傳

陳金字汝礪應城人成化進士宏治初出按浙江還因灾

異勅文武大僚十九人

明史本傳

吳一貫字道夫海陽人成化進士宏治十年按浙精敏強毅敢于有爲吏治民情洞見底裏故刷奸剔蠹無遺酌科差務節省以紓民困仍著爲條式俾垂永久民咸賴之

舊志

謝綬字朝章朝城人成化進士拜御史按兩浙值歲大饑官織作紈綺以鉅萬綬奏請裁罷從之

浙江通志

張縉字元素巴縣人正德中按浙江宸濠置心腹畢真爲浙鎮守潛圖策應縉知狀佯示款好練兵備粟以備不虞濠反鎮守傳令三司期來日四鼓下操衆疑其爲變縉定計以是日出表北禮竟則天已曙謀不得行復與郡守留

志淑議先伏兵真府外諸司盡入遂脅真使去請左右盡
得府中藏甲以屬吏兩浙得安

舊浙江
通志

唐鳳儀字應韶邵陽人正德進士十五年按浙明察有爲
嚴擊奸貪以植良善枕俗婚娶論財女多愆期不歸鳳儀
禁止抑勒俗爲一變奸民投充鎮臣爪牙害民者悉逮捕

抵法民皆誦之

舊
志

王璜字廷瓚濬縣人正德進士嘉靖中按浙江嚴厲整肅
鎮守奸胥有張南者大爲民害璜首按致其罪大吏不法
璜厲聲色窘挫之吏請悔過乃已由是上下震懾奸貪吏

望風引去

浙江
通志

李佶字子健四川人正德進士嘉靖十年以御史按浙端雅明察擊刺無諱藩臬諸大吏恃執政者內援事多不職佶首列其狀坐是忤柄臣意未幾謫南康知府士論惜之

舊志

舒汀字紹安侯官人嘉靖中巡按兩浙秉法懲惡肅吏庇民懸令各市中凡官吏抑取常例錢并和買者俾民得執以入告卽民畏勢隱忍汀恒自知之嘗有一郡倖市彩帛于民一日汀問曰聞昨市帛有之乎倖惶恐對誠有之特平值貿易非敢有侵于民也汀笑曰良然吾偶問及耳自是羣僚相戒毋多遺隸市物勢家習爲橫恣者一時抑首

自載

浙江通志

按福建通志作舒汀舊浙江通志訛爲舒江今改正

趙炳然字子晦劍州人嘉靖進士拜御史按浙江大學士徐階以浙寇甫平請設巡撫綏輯遂進炳然右僉都御史往任之浙罹兵燹久財匱力絀炳然廉以率下悉更諸政令不便者仍奏減軍需之半民皆尸祝之福建巡撫游震得請浙兵勦賊詔發義烏精兵一萬諭炳然協勦炳然言福建所以致亂者由將吏撫馭無術民變爲兵兵變爲盜耳今又驅浙兵以赴閩急竊懼浙之復爲閩也請令一意團練土著使人各爲用家自爲守急則兵緩則農然後聚

散兩有所歸卽不得已而召募亦必先本土後鄰壤庶無
釀禍本又條上防海八事俱報可瀕海餘寇流入浙江以
援勦功進右都御史

明史本傳

龐尚鵬字少南南海人嘉靖進士以御史巡按浙江民苦
徭役爲舉行一條鞭法按治鄉官呂希周嚴杰茅坤潘仲
驂子弟僮奴請奪希周等冠帶詔黜爲民尚鵬介直無所
倚所至吏民震懼民以徭輕故德尚鵬立祠祀

明史本傳

龔謙字廷益高郵人景泰進士授御史巡鹽兩浙時中官
汪直家人怙勢開市論罷之浙西亭民饑開運河使食其
力發帑金賑濟政聲大起

舊志

陳宏字丕道龍溪人天順進士成化四年按浙鹽政憲體
明肅聲望赫然適彗見詔求直言宏抗疏論商輅當康定
朝不能保護儲位以安國本無大臣風節宜罷輅以謝天
譴時輅方柄事衆莫敢犯宏獨指斥之人皆重其敢言

舊志

方珪字純潔莆田人成化進士巡兩浙鹽課時有權貴之
子鬻販私鹽巡撫檄蘇州府代爲散給民間收利數倍珪
寘諸法因劾其父貪利蠹法都御史附勢劄民知府朋姦
不職自是豪猾斂迹

福建通志

林誠字貴實莆田人天順進士成化二十年來浙巡鹽搜
蠹剔奸威名丕著先是應詔陳言與陳宏俱論商輅直聲

震臺中

舊志

藍章字文繡卽墨人成化進士擢監察御史宏治間按兩浙鹽政嚴禁私販以通商買勤恤貧寬寬其宿逋離政犁

然修舉

舊志

王潤字敷仁臨潁人正德間按浙鹽課性鯁介恥以公法徇人時劉瑾要賄賂諸道部使者率厚餉之潤獨抗然不撓瑾逮治之覲得重賂或欲爲潤稱貸潤曰吾本以耿介忤權豎乃爲生死變屈非吾心也聞者歎其毅直繫久得

釋瑾誅起擢副使致仕

浙江通志

王秀字士英萊陽人正德進士十三年以御史巡兩浙鹽

政時中貴稽留水程勢要侵牟民利商賈不行秀乃預授水程以便商立水柵于要害以遏私販場竈所在設巡兵以邏察之嚴糧船夾帶之禁由是豪右屏跡積弊肅清

舊志

王朝用字行甫隴西人正德進士嘉靖六年以御史巡鹽兩浙先是成化中以額廣商狹奏折半額解銀輸京逮嘉靖時額狹商廣鹽多私販朝用奏復舊額課充羨而官運不勞邊儲速濟民商兩便私販日弭

舊志

葉永盛涇縣人萬歷己亥按視兩浙鹽務先是丙申三殿災度支告匱牟利者紛出言浙鹽如山如林可得餉三十萬中貴倚勢要脅永盛力持之減至三萬且疏言者罔上

罪神宗察其直諫能卹商民報可人心獲安又山陝新安諸商子弟以外籍不得試永盛惜其才爲請于朝得特立商籍取入儒學七名商人德之

舊志

按省志載楊鶴以御史按兩浙鹽政攷明史鶴以玩冠得罪今刪

傅宗龍字仲綸昆明人萬歷進士爲御史按浙風節自持潔清不染猾胥率皆斂手鎮撫李某其父中後母言屢撻之一日鎮撫醉辨其誣父訴于官坐以罪每遇考核必解衣受笞十有餘年值宗龍按杭州廉得其情愍之乃注平

考

浙江通志

祝徵字文柔臨川人天啟進士崇正間巡浙江離務以恤
竈爲先而次及恤商故商竈皆悅時小粟例止肩販積次
船載並有禁而奸民數犯屢引竈戶控于徵徵立溷白之

治妄引者勒石爲厲禁竈民始克安業

浙江通志

梁雲構蘭陽人戊辰進士擢浙江巡鹽先是萬歷戊申以
漕艘開兌後期司農題歸鹽臣雲構治離之餘兼理漕政
清運之弊均衆旗之役催空督修井然有條京庾支給藉
以不乏

舊志

劉子輔字翊之廬陵人自太學生擢監察御史永樂初巡
按浙江三年不見聲色善者愛之橫者長之時按察使周

新獨持風裁不苟許與乃數數稱子輔為賢陞廣東按察

使

浙江通志

吳訥字敏德常熟人宣德初出按浙江以振風紀植綱常為務時軍犯逃者往往令家人妾媵逮繫至千人訥請嚴禁卽寃不得越告從之

明史本傳

秦檜碑人仰其風

浙江通志

陳玉宇德卿沂州衛人成化進士宏治十一年清戎兩浙持法秉正不激不撓後陞浙江提學副使學政公平品鑒

精當

舊志

程材字良用歙縣人宏治進士十八年以清戎按浙疾革

召屬吏語曰吾爲繡衣使者上不能宣德意以振綱維次不能綜簿書以報成命死有餘愧慎母歛賵賻以益吾過時有族叔在浙西求一訣材曰爲謝吾叔察院豈私見所

耶叔大哭而去

舊志

何思字慎之直隸雄縣人嘉靖壬辰進士丙申以工部主事司權南關清慎不淄嘗假武林驛一名刺匣瀕行亦檢

還之

舊志

鄔紳字佩之丹徒人嘉靖進士司稅北關清省涖職課銀

惟主驗解餘無所濡染

浙江通志

荆之琦字鴻玉丹陽人萬歷進士以戶部主事權杭州北

關甫下車進官吏巡胥與約法犯者立譴責之時吳中大
雨又兼徵兵索餉商旅不進或虞其課缺勸加額之琦守
初約如故已而賈舟大集復以羨報關南北河壩可十里
而遙皆傾圯不治乃鳩工斃石行旅稱康衢焉

浙江
通志

金九陞號樊桐直隸全椒人以戶部主稅北關初關稅甚
抄天啟間驟加四萬商賈苦朘削又值亢旱舟楫不行九
陞寬稅額革餘資禁吏胥之爲蠹臆者商民皆悅人或詢
其何以得報額九陞曰權關之弊有二好尊優則憚親瑣
屑勤細微則旁寄耳目弊乃百出于皆親之商民至于前
者可以情告可以理陳寧有掩蔽子聰明者哉商民德之

勒石以頌

舊志

陳嗣元字澄所直隸華亭人戊戌進士以工部主事權稅南關往小賈受大商役者或負母錢逸去不得問嗣元至小賈聞其才敏而恕逸者多歸償其負又牙僧有所侵負榜責荷校相踵而無改嗣元曰是無以恥之耳令書負且愆期者姓名于籤月朔望掣籤呼名商東牙西迺曲諭負者以限責償季終別其頑善而獎懲之畢償者實以花幣于是翕然改行以後償爲愧山民或伐木作室而仇者以告關檄一出囊橐多盡嗣元曰彼伐木作室未嘗通商豈在稅例筭而遂之民又大悅

舊志

劉伸字叔達廣昌人萬歷進士以工部郎出督抽分時適
涪潦漂木沉商擁輿而泣伸與羣商約法所以甦商困者
八事往解部餘銀改屬織造府而更其名曰料銀又以大
工加稅三千有奇甲寅赦書云三分減一伸力爭餘銀宜
解部不宜飽中涓加稅宜盡蠲不宜量減一其辭危厲而
司農格不行然商民感其德鐫石頌之

浙江
通志

安然字資善祥符人洪武五年授浙江布政使崇禮教黜
奸頑十一年海潮齧江岸爲患然親率丁夫伐石砌築堤
成民得安居陞御史大夫

浙江
通志

王鈍字士魯太康人元進士洪武中爲浙江布政持身廉

介泄政勤敏吏胥憎服嘗伐石以捍江濤民免墊溺歲旱
禱雨卽應憂民不遑寢食民咸德之

浙江通志

黃澤字敷仲閩人永樂進士宣德三年擢浙江布政使在
官有政績

明史本傳

奏罷無徵米六十萬石在任九年劾罷不

職郡縣吏五十七人

浙江通志

孫原貞名瑀以字行德興人永樂進士正統八年遷浙江
左布政使久之浙閩盜起命原貞叅議軍事深入擒其魁
拜兵部左侍郎鎮守浙江浙官田賦重右布政使楊瓚請
均于民田輕額者詔原貞督之賦得以平進兵部尚書鎮
守如故原貞所至有勞績在浙江尤著

明史本傳

胡松字汝茂滁人嘉靖進士三十九年任按察使晉右布政使素負經濟遠畧凡兵防國計吏治民瘼皆具石畫自奉敝衣惡食蕭然不異寒士風厲郡縣首舉守已愛民二事告諭惓切多感奮思勵

舊志

周延光字斗垣蘄水人萬歷進士知金華府政靜民和晉副使提督浙學遷本省左布政凡收筦關支皆躬自閱視

主藏吏抱贖記出納而已宿弊一清

浙江通志

滿復周山東章邱縣人徵授浙江右布政政尚安和聲績

大著

舊志

艾瑛陝西隴州人器宇深沉莫測其涯涘永樂己亥州守

以瑛薦成祖一見奇之超拜浙江右布政甫下車卽詢民
所利弊興革無遺初藩司公署及杭學文廟悉燬于火瑛
命有司重建興舉大役而民不告病

舊志

張憲字廷式德興人成化間進士宏治中浙江右布政使
鎮守中官縱左右虐民而攫其財憲廉得其人置于理岳
武穆祠在西湖故有祭田二頃爲勢家所據憲檢覈畀祠
又訪其苗裔使占籍倚郭得食其租入世其蒸嘗交承例
閱庫藏主吏報羨銀若干憲曰杭人方苦篋貢以此助之
豈非一分之賜乎吾弗能竊取爲自殖計也仍封識責之

主吏

浙江通志

徐源字仲山長洲人成化進士歷浙江右布政凡三蒞場
屋浙藩拆卷多儒士御史意欲有所前却源曰科場所取
者文卽通榜儒士何傷源溫粹寬仁人稱長者而臨事執
守堅定雖當官蒞政未嘗一日去書不觀

浙江通志

雍泰字世隆咸寧人成化進士宏治初浙江右布政使吏
部尚書屠瀟家衆販私鹽鄉人倣效盜竊橫行泰先收屠
家衆抵罪同官咸諍泰曰如此爲屠公福耶且屠公寧知
之屠公不知我爲禁治非其助耶

浙江通志

周孟中廬陵人成化進士任浙江布政使凡先賢遺跡輒
崇尚以示向往減織造歲幣十之半

浙江通志

安惟學字行之山西臨汾人成化甲辰進士正德三年任
浙江右布政爲政公清彊介馭下嚴明皆相戒莫敢爲非

舊志

蔣昇字誠之全州人成化進士正德中浙江按察使轉右
布政鋤奸蕪惡不遺餘力蒞政臨事悉揆之以理少有未
安毫髮不敢苟論者謂其居官真無愧于古人云

舊志

湯沐字新之直隸江陰人宏治進士正德十一年陞浙江
右布政使操履貞白持法堅定人莫敢以私干之雖居右
轄而剔蠹鋤奸屹著風采爲庶寮所尊憚

舊志

孫祿山東棲霞人宏治進士嘉靖二年任浙江右布政性

骨鯁權貴撼之不爲動初爲兵曹郎忤逆瑾意遂遭廢錮
晚節任藩司操執愈勵人皆壯之

舊志

馬卿字敬臣河南林縣人宏治乙丑進士嘉靖二年擢浙
江右布政政先節儉守正不阿裁抑中官織造靡濫爲所

誣奏逮赴詔獄責數秩已而復起

舊志

邵錫字天祐直隸安州人正德戊辰進士嘉靖十六年進

浙江右布政使風節峻整人皆畏其嚴正

舊志

范涑由進士以臬副轄杭嚴杭會城物衆地大號難治涑
既視事勤撫摩簡浮冗慎撻發遠請托當湖故藩伯張大
忠身後羣奴利其財幾半而陳可學者尤肆且有隱惡久

匿不出涑以嚴檄立出之坐以重辟又海昌貴人艷故徽
州守胡別業持偽券挾鹽使者勢欲得之涑力持其事別
業竟無恙久之以他藩進浙江右布政未幾視左篆錢穀
之數出入必以格吏不敢爲奸

舊志

黃勉江西浮梁人永樂六年任浙江左叅政惠養所部不
瘠民以充上供時徵柳箱青器非杭所產奏請罷之民歌

其德

舊志

饒禮江西南城人由國子生授御史擢浙江左叅政在臺
中以嚴見憚及官浙省乃更爲愷悌仁恕政尚寬和吏民
皆愛戴之

舊志

韓雍字永熙長洲人正統進士天順末以兵部右侍郎出
爲浙江叅政素望服人在浙興利除害靡不允當

浙江通志

胡纘宗字世甫陝西泰安人正德戊辰進士嘉靖六年陞
浙江左叅政浙西爲所部按屬凜凜嘗突至郡邑周視庫

藏親錄繫囚下吏無敢飾以明察忤物竟被飛語左遷

舊志

盧蕙字子貞直隸山陽人嘉靖癸未進士十六年擢浙江

按察司副使嘗署學政加意風勵士論翕然稱之進左叅
政重惜法紀不徇情縱舍屬邑吏有以賄敗者人多以甲
第憐之蕙獨無所寬貸竟褫其秩邑人稱快

舊志

趙和字雲翰祥符人洪武舉人建文初遷浙江叅政建策

捕海寇有功自奉如寒素

明史本傳

俞士悅字仕朝長洲人永樂進士正統四年任浙江布政司叅政初至佯若不解事者羣吏易之越數日盡得其奸猾狀發摘若神吏大驚倭寇犯境修乍澉二浦城以備之

浙江通志

陸容字文量太倉人成化進士任浙江右叅政究察民隱振作士氣行縣至桐廬發漁家兄弟殺於潛丐者夫婦事人傳以爲神旣乃條列浙中便宜十事悉見施行間因公務入京論漕渠利病語斥權貴益容少卽有志天下如兵刑水利之類有所得輒手書之冊後多見于用云

浙江通志

羅鑒湖廣茶陵州人成化戊戌進士宏治十四年陞浙江右叅政温良樂易事無詭隨爲政寬而有制雖不以矜炫立名而器宇近人可觀累官副都御史劉瑾索重賂不應

遂落職

舊志

馬紀字直卿河南鈞州人正德丁丑進士嘉靖二十年任浙江布政司右叅政保民若子而嫉惡好貪如寇仇然所部畏其嚴明郡二千石有與紀同年者亦悚然憚之遇事不平輒力爭或已志不伸輒忿懣累日竟疽發背卒

舊志

蔡懋德字維立崑山人萬歷進士除杭州推官執法嚴事案無留牘

舊志

累遷布政司右叅政兼按察副使屠阿尹者

湖盜也踞湖有年御史謝某疏請設隘浙直界地增叅戎
置兵而合浙直諸廂軍勦之懋德曰賊可縛致必贖兵擾
民何耶密捕窩盜家貫其死散歸湖濱約日有捕至湖者
第舍之假捕卒爲估賣兒先後踵至屆期而烽生尹義兒
沈千斤者有驍名捕分趨賊營沈左右救力敗遽趨沈沈
大創尹奪氣遁陷水澤中追者生擒之盜平無何以艱歸
民留之哭曰還我蔡公復仕至山西巡撫殉節諡忠襄

通志

郭子章字相奎泰和人萬歷進士爲浙江左叅政督理漕
儲嘗題名于右曰孔子云苛政猛于虎螭游于濁而食于

清諸君子交相淬礪寧爲螭母爲虎也

浙江通志

武達字仲道山西大同人以鄉貢起家宣德壬子擢布政司右叅議老成練達政務寬仁行部郡邑輒旁咨民隱有利弊當興革者奮然自爲勤宣上德勞來不怠吏民皆親

愛之祀名宦

舊志

張敷華字公實安福人天順進士成化中浙江右叅議陞叅政遷右布政使凡在浙十餘年不求赫赫聲而境內大治仕至左都御史諡簡肅

浙江通志

祝鑾字鳴和直隸當塗人正德戊辰進士歲庚辰擢浙江右叅議翩翩文雅以儒學飭治持重端凝政無隳紊每休

沐敏研精簡編或爲聲詩考古析疑孜孜不息居久之遷
福建巡海副使去

舊志

姜儀字君肅江西南昌人正德甲戌進士嘉靖癸巳任布
政司右叅議忠勤體國慈惠恤民每興革利弊不動聲色
而事集民安人咸德之

舊志

柴儒字伯真陝西白河人正德辛巳進士嘉靖癸巳擢布
政司右叅議持已甚介接人以和行部列郡務搜剔奸蠹
諸爲民害者悉釐正之豪強屏迹貪墨者無所容後以憂
去民恒思慕

舊志

王良字天性祥符人建文中歷遷刑部左侍郎議減燕府

人罪不稱旨出爲浙江按察使燕王卽位頗德之遣使召
良良執使者將斬之衆劫之去良集諸司印于私第將自
殺未卽決妻問故曰吾分應死未知所以處汝爾妻曰君
男子乃爲婦人謀乎饋良食食已抱其子入後園置子池
旁投水死良殮妻畢以子付友人家遂積薪自焚印俱毀

明史本傳

正德戊寅按察司梁材卽司門內東南水盥亭爲祠

祀之榜曰忠節

浙江通志

周新初名志新南海人永樂中任浙江按察使初入境羣
蚋迎馬頭跡得死人榛中身繫小木印新驗印知死者故
布商密令廣市布視印文合者捕鞠之盡獲諸盜一日視

事旋風吹葉墜案前異之詢左右獨一僧寺有之去城差遠新意僧殺人發樹果得婦人屍鞠實磔僧一商暮歸藏金叢祠石下歸以語其妻旦往求金不得訴于新新召商妻訊之果商妻有所私商驟歸所私尚匿妻所聞商語夜取之妻與所私皆論死新微服行部觸縣令繫之獄新從獄中詢諸囚得令貪污狀告獄吏曰我按察使也令驚謝罪劾罷之當是時周廉使名聞天下錦衣指揮紀綱使干戶緝事浙江攫賄作威福新欲按治之遁去新入京遇干戶涿州卽捕繫州獄脫走訴于綱綱誣奏新罪帝怒命逮新至伏陛前抗聲曰臣奉詔擒奸惡柰何罪臣帝愈怒命

戮之臨刑大呼曰生作直臣死當作直鬼竟殺之他日帝
悔問左右曰周新何許人對曰南海帝歎曰嶺外乃有此
人一日帝見緋衣立日中曰臣周新已爲神爲陛下治奸

貪吏云

明史本傳

王玘字孟石安肅人洪武末浙江按察司僉事振肅風紀
務詢民瘼屬司畏憚民蒙其惠

浙江通志

林碩字懋宏閩縣人永樂進士宣德初按浙江爲治嚴肅
就擢按察使千戶湯某結中官裴可力爲奸利碩將繩以
法中官誣碩毀詔書被逮碩叩頭臣日夜淬勵思報上恩
小人不便欲去臣帝動容釋碩復其官碩在浙久人懷其

德遷廣東布政使卒

明史本傳

柯暹直隸廣德人正統中由舉人擢浙江按察使初暹本以建言觸忤權貴繫獄三載直聲震天下及來浙人多憚其威名乃持法平允務存大體不瑣瑣苛察以誅細尤令嚴惠敷所部皆畏懷之

舊志

軒輓字惟行鹿邑人永樂進士用薦改御史正統元年清軍浙江劾不職官四十餘人擢浙江按察使前使奢汰輓力矯之寒暑一青布袍補綴殆遍居常蔬食妻子親搽井臼與僚屬約三日出俸錢市肉不得過一斤故舊至食惟一豆或具雜黍則人驚以爲異時鎮守臣阮隨布政使孫

原貞杭州知府陳復仁和知縣許僕居官皆廉一方大治
景帝立以右副都御史鎮守浙江景泰元年命兼理兩浙
鹽課閩賊流劫討平之天順元年召拜刑部尚書帝召見
曰昔浙江廉使考滿歸僅一簾乃卿耶輒頓首謝

明史本傳

陳璇字在璣鳳陽人登進士第爲浙江按察使寬不縱猛
不殘浙人懷德或謂璇少擊捕風璇曰法貴禁人不犯不
從禁而罹于法某亦何嘗少貸耶後赴闕軍民數千人填
衢塞巷挽留之馬不能前璇駐于城之宗陽宮一宿黎明
取間道而去

浙江通志

曾蒙簡字以行江西泰和人正統乙丑進士天順三年任

浙江按察使聽謙精明同列皆歛手讓之錢塘僉事王琦者廉吏也既卒棺衾不備蒙簡與布衣秦敬代爲賙歛人

高其義

舊志

李敏字公勉襄城人景泰進士授御史天順初任浙江按察司明習憲紀性復謹厚臨下不峻威嚴政先仁恕未幾

以憂去

舊志

劉鈞字伏和安福人天順進士成化初任浙江提學副使精鑒得士科條肅然儒風丕振遷按察使聽訟明允剖疑

發隱庭中稱平

浙江通志

楊繼宗字承芳陽城人天順進士任浙江按察使時倉官

十餘人坐缺糧繫獄至鬻子女以償繼宗欲寬之而無由
一日送月俸至命量之則溢原數較他司亦然因悟倉吏
缺糧之由將其實以聞衆懼願捐俸代償由是十人者獲
釋聞母喪立出止驛亭下盡籍廨中器物付有司惟携一

僕書數卷而還仕至僉都御史

浙江通志

戴珊字廷珍浮梁人天順進士成化二十年任浙江按察
使德性和粹顧耿耿不苟合奉職守法不爲物撓祿仕四

十餘年家無餘資官至左都御史諡恭簡

浙江通志

于大節字守正江西進賢人天順甲申進士宏治初任浙
江按察使天性毅直始官臺中旣以建言左官及長浙憲

風節愈高摘伏刺奸威望大著竟以觚稜不阿權貴爲人
誣構遂稱疾去大臣交章論薦力以疾辭朝廷強起之改

山東按察使卒

舊志

閻仲字字叅甫陝西隴州人成化乙未進士宏治初擢浙
江按察使操履端潔喜怒不見于色臨政務期恩勝雖不
矯矯苛察而風采自著祁寒暑雨必預止按屬迎送惠養

所部撫之若子

舊志

劉福字順夫四川巴縣人宏治九年陞浙江按察使風儀
峻整法紀森嚴部內憚其威名後以誑誤改貴州按察使

聞盤江賊起福挺身赴之遂死于賊

舊志

按後有郡守亦名劉福攷其事蹟鄉貫各不相伴定屬
兩人故仍舊並載

朱欽字懋恭福建邵武人成化戊辰進士宏治辛酉陞浙
江按察司副使進按察使臨政馭下兢兢以法紀自持風
槩凜然後官都御史時逆瑾嫉其同事王岳矯詔賜死欽
上疏列其事狀瑾屏不以聞坐免官

舊志

孫需字孚吉德興人宏治十三年爲浙江按察使持法砥

操憲體肅然

舊志

王一言字行之四川內江人成化辛丑進士宏治末任浙
江按察使鋤強輔弱憲度精明飭筦鍵慎闕防家衆凜凜

下吏憚其威重不敢爲非聞親喪卽時就道衰麻徒跣至

水濱然後登舟人皆歎其知禮

舊志

席書字文同遂寧人宏治進士正德八年按察浙江擒治豪右逐貪酷吏釋冤獄臬政一新陞南京兵部侍郎禮部

尚書武英殿大學士諡文襄

浙江通志

李承勛字立卿嘉魚人宏治進士歷陞浙江按察使事持大體凡貪墨吏雖親故不曲庇或本廉吏而爲毀者所中傷力伸雪之憲紀肅然仕至兵部尚書

浙江通志

竇子偁字淮南合肥人萬歷進士浙江按察使清貞剛斷斥絕請托一時奸橫斂跡進右布政使一日曉開門有數

夫昇巨桶寘于私署子偁詰問對曰此乃羨餘也解京餉
畢例宜分送耳其實左藩愍其過清爲稍給官厨計子偁
勃然曰朝廷正苦餉不足安得有所爲羨餘哉搃乃欲汚
吾地耶速昇去母以身試法昇夫肩桶出命取水滌之

浙江通志

周敏字好學沔陽人永樂中任浙江按察司副使性明敏
遇事立斷鞫訊獄訟洞察情偽徃無滯獄

浙江通志

李素平谷人永樂中任浙江按察司副使發奸擿伏下無
遁情用刑平而恕于民不擾仁宗召爲右副都御史

浙江通志

魏源字文淵江西建昌人永樂進士除監察御史洪熙元

年出爲浙江按察副使明習政體庶獄詳慎下吏有讞決
不當者輒面加詰責然心無疑滯繼以事來議卽溫顏遇
之以是吏輸誠而服其量云

舊志

陳鎰字有戒吳縣人永樂進士授御史陞浙江按察副使
用法寬平臨事簡易民信愛之

舊志

嚴孟衡字衡中分宜人永樂進士浙江按察副使涖任前
一夕胥吏不戒于火案牘燬孟衡自引辜受罰運磚逾年
有白其枉者赦復職時法網稍密孟衡悉心平反一牘中
至理冤濫數十人

浙江通志

趙禮河南洛陽人永樂壬辰進士初觀政臺中輒著風節

宣德間陞浙江提學副使品鑒精明時周璇姚夔尚未知名禮獨首拔之稱爲偉器後二人皆大魁天下而姚復爲名臣其明于知人若此

舊志

許銘南昌人永樂進士宣德初爲浙江按察司副使持憲

嚴明人不敢干以私興利除害民皆感服

浙江通志

陶成字孔恩博林人舉人正統中擢浙江僉事成有智畧遇事敢任倭犯桃渚成密布釘板海沙中倭至艤舟躍上釘洞足背倭畏之遠去秩滿進副使處州賊葉宗留等僞爲鄉民避賊者入城縱火官軍驚潰成與都指揮崔源驅兵出戰死時景泰元年五月也事聞贈成叅政錄其子魯

爲八品官

明史本傳

張和字節之直隸崑山人正統己未進士景泰間擢浙江按察司副使提督學校矯矯風節不濡足權門善於獎進多所成就及卒于官諸生數百人哭之

舊志

楊瑄字廷獻豐城人景泰進士憲宗卽位遷浙江副使按行海道禁將校私縱戍卒修捍海塘民得莫居爲副使十餘年政績卓然進按察使西湖水舊可溉諸縣田四十六萬頃時湮塞過半瑄請浚之設防置厠以利灌溉功未就卒

明史本傳

斷訟明敏無留獄禁官署母蠶桑以爭民利諸婦

女母入寺觀墮風俗甫半載病亟寮來問候尚論築海塘

法及濬西湖之利無片言及私

浙江通志

張文字存簡泰州人成化進士任浙江按察司副使有鹽商李成誣販鹽者爲盜轉引至十九人初訊者以爲實多疫死獄中存者僅六人文覆訊疑之審詰得其情六人者幸不死餘平反者尚多在浙踰年大率以洗冤澤物爲已

任

浙江通志

魏富字仲禮龍溪人成化進士浙江按察司僉事進副使重舞文告訐之禁有豪猾誣縣令富爲直之浙東岸江田爲水所齧富命築石隄凡捍田若干頃歲饑賑貧民所活

甚多官至刑部侍郎

浙江通志

鄭紀字廷綱福建仙遊人天順庚辰進士宏治元年擢浙
江提學副使能以師模自尊學期用世正樂舞行鄉射毀

淫祠以古道匡時風俗振肅

舊志

吳伯通字原明四川廣安州人天順甲申進士宏治三年
擢浙江提學副使嚴立科條以督諸士諸士亦嚴事之甄
別精當善獎進士如胡端敏孫忠烈秦從簡輩皆識拔於
疇伍中以國器期之後皆樹忠節以功德知名當世

舊志

文貴字天爵遼東錦州人成化乙未進士宏治三年任浙
江巡海副使拔才將簡士伍練兵積儲建立墩堡以資備
禦號令詳慎聽斷公平在任七年竟無枹鼓之警海壖宴

然舊志

劉洪字希範湖廣安陸衛人成化戊戌進士宏治初任浙

江按察司副使臨政果決聽鞫精明獄無淹繫舊志

趙寬字栗夫吳江人成化進士浙江按察司副使提督學

政學間淹貫能推所以變士習經指授者爲文皆有程
度不以權勢有所軒輊遇人坦率不事表襮浙士愛而重

之浙江通志

張濱字廷賓山東單縣人成化乙未進士宏治中陞浙江

按察司副使性直諒守法盡職以名節自勵劉瑾柄國不

通餽謝遂勒致仕後復起舊志

彭澤字濟物蘭州人宏治進士正德初遷浙江副使純誠

曲諒持憲嚴明好善嫉惡一洗脂韋軟媚之習

浙江通志

徐蕃字宣之直隸秦州人宏治癸丑進士正德八年擢浙江按察司提學副使操持端介不爲貴勢所撓品鑒精核

崇雅抑浮每進退人才士論允服

舊志

劉瑞字吉士內江人成化進士正德中浙江按察副使提學較士公明先德行後文藝所行條約切于身心

浙江通志

何瑋字粹夫武陟人宏治進士嘉靖初提學浙江敦本尚

實士氣丕變

明史儒林傳

遇諸生恩意優渥如家人父子或有

株連保護甚備寮長諷之曰士習澆漓此殆可以法馭難

以恩結也。瑋曰：彼非吾子弟，耶奈何！以徒隸遇之，若蕩節踰檢，吾有法在耳。多士感其德化，戢戒無敢犯有司者。及遷秩戒行，同官設祖都門。士初未集，僚長以言激之曰：士不可感化。若是公初不用吾言，今如何？瑋曰：吾固止之，非士薄也。及酒行，傾城士皆出走。滿轂下，瑋曰：士不可感化。若此哉！吾且去，果不用吾命矣。僚長有慚色。

舊志

萬潮字汝信，進賢人。正德進士。世宗立，起浙江提學副使。久之，遷叅政，以忤權貴，調廣西。

明史夏良勝傳

藻鑑精當，所拔皆

一時俊髦，惇崇實學，以興斯文爲己任。人知向方及叅藩，亦多惠政，民咸誦之。祀名宦。

舊志

張岳字維喬惠安人正德進士嘉靖己亥任浙江提學副使學宗伊洛文有法程善于廸士所至皆服其化未幾轉

浙江叅政爲政博大周詳禁奸釐弊吏不敢肆祀名宦

舊志

陸深字子淵上海人宏治進士授編修歷祭酒忤輔臣謫

同知晉山西提學副使改浙江

明史本傳

師範嚴肅議侃侃不

阿務以身教正文體黜浮華以興起斯文爲己任未幾去

浙士恒思慕之

舊志

汪文盛字希周崇陽人正德進士嘉靖時浙江提學副使闡明正學飭修書院禁西湖冶遊訂東澗鄉約品隘無爽

文行以興

浙江通志

徐階字子升華亭人嘉靖進士擢浙江按察僉事提督學政以正文體端士習爲先旣唱第人人爲語所以甲乙之故卽見斥者得自鳴創浙江通志歷建極殿大學士諡文

貞

浙江通志

潘奉先字輔之山西太原人任浙江按察司僉事政尚寬和不事察察疾俗吏以虛名炫實恥求人知在官六年持

法平允未幾以老乞歸

舊志

吳琳黃岡人吳元年除浙江按察司僉事樸茂無華不厲聲色而憲度貞肅風采奕然理鹽政恤竈通商防範嚴密

私販旣弭國課益充

舊志

劉宜正字季道江西吉水人洪武初以明經薦始拜起居注遇事敢言首發御史大夫陳寧奸深爲上所信重已而拜浙江按察司僉事幹敏有治才憲度修明風紀振肅

舊志

裴璉字汝器湖廣監利人洪武中由太學生再擢至浙江按察司僉事政尚嚴明不撓貴勢鋤強輔弱所部畏而懷之雪冤獄疏淹繫庭中稱平至于甄別人才作興士類尤

所汲汲

舊志

花潤生字蘊玉福建邵武人永樂甲申進士宣德八年任浙江市舶提舉文學經生多詣門受業正統三年陞浙江僉事提督學校品校精明科條詳密年七十引年以歸行

李蕭然

舊志

熊諫字學淵江西進賢人宣德庚戌進士正統間擢浙江按察司提學僉事嚴立科條釐革宿弊其造士以行誼爲先且明于知人甄別不爽諸所去取士心允服在浙八年始以常調遷去處之恬然

舊志

沈敬直隸松江府人正統間任浙江按察司僉事持法不私官吏震懾風蹟振于一時未幾引去

舊志

謝潤字德潤直隸祁門人天順庚辰進士始官郎署以剛介質直聞尋陞浙江按察司僉事悃愾無華不矯矯矜炫而廉直公平風紀振肅冰蘖之操久而益厲

舊志

郭觀廣東歸善人由舉人成化間擢浙江按察司僉事事無巨細必親爲裁決嫉惡如仇奸貪之吏皆重足屏息歷官二十餘年清操不渝致仕歸家徒壁立解衣質米羣稱

廉吏

舊志

張悅字時敏華亭人天順進士成化中出爲江西僉事改督浙江學校力拒請託校士不糊名曰我取自信而已

明史

本傳

王華字廷光江西南昌人成化乙未進士宏治間陞浙江僉事性堅正慎惜法紀而意常近厚鋤強輔弱興學育才政務犁然有紀未幾感疾卒于官

舊志

李遜學字希賢上蔡人成化進士浙江按察僉事提督學政教人寬而有制以敦行尚實爲本人才高下甄別不爽其有奔競者裁抑之士習翕然一變

浙江通志

蕭翀字凌漢四川內江人成化辛丑進士宏治十一年陞浙江按察司僉事才識明敏遇事不爲持難當機立斷在任六年風采振揚清操冰潔民情士論皆歸之

舊志

陳璘字廷瑞山西陽曲人宏治癸丑進士正德初陞浙江按察司僉事慎惜法紀恪守官常洞鑑下情精于聽讞所部吏畏民懷狐鼠屏迹

舊志

杭淮字東卿直隸宜興人宏治己未進士正德五年任浙

江按察司僉事政清刑簡雪滯理枉庭中稱平

舊志

王金字曰良河南臨潁人宏治壬戌進士正德己巳擢浙江按察司僉事屬兩浙大饑金入境不待牒報鎮巡輒發廩賑貸時中官鎮守誅求細尤當路者皆重賄免禍金至温州守具白米千石爲餉金詰之守曰昔公以專制發倉忤中貴假此與之爲脫禍資耳金曰爲民而歿民可乎秀才何怯懦至此遂揮去人皆服其壯節已而中貴竟亦無

能爲也

舊志

楊惟康字叔安河南靈寶人宏治己未進士正德五年任浙江按察司僉事分治杭嚴清介嚴肅風裁凜然搜弊剔

奸人皆畏服

舊志

韓邦奇字汝節朝邑人正德進士六年遷浙江僉事轄杭嚴二府宸濠令內豎假飯僧聚千人于杭州天竺寺邦奇立散遣之其儀賓託進貢假道衢州邦奇詰之曰入貢當沿江下奚自假道歸語王韓僉事不可誑也時中官在浙者凡四人王堂爲鎮守晁進督織造崔瑀主市舶張玉管營造爪牙四出民不聊生邦奇疏請禁止又數裁抑堂邦奇憫中官採富陽茶魚爲民害作歌哀之堂遂奏邦奇沮格上供作歌怨謗逮下詔獄斥爲民嘉靖初起山東叅議

明史本傳

盛端明字希道廣東海陽人宏治壬戌進士以省元擢第
正德十四年陞浙江按察司提學僉事先是督學使以訶
察覈士稍嚴當事議宜得公正和平者代之衆舉端明乃
解館職出典學政既至則按前所黜士無顯狀者盡與一
試爲收復者甚衆嘗曰育才如種樹廣栽多植方得成林
合抱參天胥此焉出豈可盡疑其爲荆棘悉加芟刈耶端
明雖冲和温粹而性不詭隨人莫敢以私干之

舊志

熊允懋字士勉四川資陽人正德辛未進士嘉靖癸未陞
浙江水利僉事往者豪強多侵水利致妨農業及允懋至
嚴爲之禁諸所據于豪大家者悉加釐正以業貧民宿弊

頓革杭有貴勢挾長欺孤而佔其產允懋一鞠得實力爲
直之勢家祈請不已堅拒弗聽輿論快然

舊志

彭占祺字朝吉山東費縣人正德甲戌進士嘉靖四年任
浙江按察司僉事直已守道不爲逢迎憲節所臨風紀丕
振竟以觚稜不偶於俗丙戌考叅去歸素蕭然時仁錢二
縣尹知其貧各餽長夫二名以資路費力辭不受二尹嘆

服

舊志

林雲同字汝雨福建莆田人嘉靖丙戌進士癸巳任浙江
提學僉事以明正學廸人材爲已任敦德崇行進諸生以
古道每行部與諸生講論道藝多歸于仁義中正亶亶忘

倦士皆惕然有省藻鑑精明所甄拔多奇才異等繼崇陽

汪文盛之後稱知人能得士者至今皆曰汪林兩公云

舊志

胡堯臣四川安居人嘉靖戊戌進士任浙江按察司僉事

後數年復陞浙江左叅政轉按察使未幾進右布政使尋

轉左操履粹白臨政公平聽斷明允物情輸服其在藩轄

也定經制節浮濫宿弊旣清民力大舒列郡咸愛戴之

舊志

蘇溶字君禹晉江人萬歷進士浙江提學校士率單車入

館中不傍倩於人每卷必閱竟或重閱然後定甲乙所得

皆雋才浙榜發七十餘人皆其前茅士也

浙江通志

薛應旂字仲常武進人嘉靖進士累陞浙江提學副使爲

文鴻博典贍鑒衡百不失一或一學無高才卽從二等錄名甚有從他邑得佳士移領其案者心無私利恒力破文網爲之竟中考功法而歸在浙著有嘉靖浙江通志浙江通志

黃鳴駿字啟甸莆田人萬歷進士任浙江提學叅議取文不拘一體高奇平淡率歸大雅改杭嚴兵備超擢都御史

巡撫浙江甫三月值甲申之難鳴駿慷慨誓師將出討閩

賊聞江南馬士英用事解綬歸

浙江通志

李慶字積善沔陽人國子監生正統時擢浙江都轉運鹽司運使兩浙鹽利爲他運司甲巨商豪買投券者踵相躡於庭慶嚴簿書時出納絕請謁有持券請鹽者按歲月先

後給之權貴請托謝絕不顧在官二年歲課三倍

浙江通志

張吉字克修江西餘干人成化辛丑進士正德四年官兩浙運使操履潔白不以一介自緇雖職錢穀性度冲曠有

翩翩文吏之風恤竈通商國計饒溢

舊志

方仕字克學固始人正德進士嘉靖中兩浙都運使清操卓勵簡于事上而厚于恤民故於俗寡諧時世宗以節槩勵羣臣命四品以上毋得折腰以見上官仕仰遵上旨不爲降禮監司摧抑之仕卽時投劾去監司者猶檢束任內所行毫無污穢乃移檄慰留而去已遠矣

浙江通志

張繼孟號泰巖陝西扶風人已未進士自戶科給事出爲

浙江都轉運使時鹽法久敝蠹猾百出胥吏因緣爲奸列
票混更正額壅塞一切詣引銳則病商留則病課繼孟變
通斟酌而定以完銀緩銳之法于是公私均利焉

舊志

胡軫字敬同豐城人永樂進士任浙江都轉運鹽使司運
同持身廉儉一毫不妄取于人常俸不給至鬻園蔬足之
請托不行商旅被惠每出人爭趨言願爲犬馬走因肩其
轎行揮不去陞浙江按察司副使提學士人宗之

浙江通志

錢澗字希孟直隸阜城人嘉靖六年任運司同知性高潔
恥以財利自汙司鹽政者八年冰蘖之操始終無玷爲政
不務矯飾無赫赫名而商民實陰德之

舊志

李和山東益都人宏治十四年由郡掾任兩浙運司知事
清白自勵常俸之外矚然不淄嘗攝分司督課果決精明
奸胥莫不畏服豪竈憚其風采不敢以家衆應役正德初
陞本司判官進副使釐奸革弊鹽政一清舊志

張劬號信齋夔官指揮同知中武舉當事者選視屯政會
歲凶賦無所入士卒窘甚劬慨然變腴產代輸聲大振直
指與督撫交薦之擢總浙西漕事事治軍民懷服舊志